

Fwen Vahsengj Lai Sing-bouh Bouxgun Sunghbwz

□ Godoq comz hoiz



▲ Fwen Vahsengj seizneix hix miz vunz maij dingq.



▲ Song canghfwen doxdax eu fwen Vahsengj mizyinx dangqmaz.



▲ Seiq bouxgeq dangdieg eu fwen Vahsengj.



▲ Canghfwen aeu fwen Vahsengj haenh seizdaih moq.



▲ Aen gihdi swncienz biengj baiz lo.



▲ Canghfwen daiq gyoengq nyez eu fwen Vahsengj.



▲ Bouxswncienz son gyoengq nyez eu fwen Vahsengj.



▲ Bouxdingq fwen Vahsengj lai dangqmaz.

Fwen Vahsengj lai singbouh Bouxgun Sunghbwz dwg cungj fwen Bouxgun gag cauh, youq Nanzningz Si Hinghningz Gih Sanhdangz Cin, Vujdangz Cin, Gunhlunz Cin daengj dieg Bouxgun youq caeuq ranghdieg seiqhenz haenx cienzlah. Aenvih cungj fwen neix giz mizok dwg Sanhdangz Cin Sunghbwz Cunh, neix couh heuhguh fwen Vahsengj lai singbouh Bouxgun Sunghbwz. Aenvih gyoengq vunz Sunghbwz Cunh daihbouhfaenh dwg Bouxgun daj baihaek senj daeuj, gyoengqde gangj Vahsengj, youq ranghdieg Bouxcuengh, Bouxgun doxcab youq haenx, neix couh miz lai cungj vahgangj caeuq sibgvenq ndawbiengz doxgyau doxsup doxyingjyangj, couh cauhbaenz le gij fuengsik eu fwen gagdog dangqmaz.

Fwen Vahsengj Sunghbwz Cunh gaenq miz 400 lai bi lizsij, swncienz ndaej 21 daih vunz. Cungj fwen neix miz sam aen daegdiemj: Fwen Bouxgun, aeu Vahsengj eu, aeu lai singbouh eu. Cungj fwen Vahsengj vunzlai maij dingq neix youq dangdieg miz diegvih linghgag. Gyoengq vunz ranghdieg Sanhdangz Cin, mboujguenj ranz lawz banhlaeuj cingjhek, cungj gyaenz cingj Sanhdangz Cin bouxfwenvuengz Banh Yinghyungz daeuj eu fwen Vahsengj, baengh neix hawj ndaw ranz banhlaeuj lai nauhyied.

Cungj fwen neix aeu fwen lai singbouh Bouxcuengh guh giekdaej hwngfat baenz. Cungj fwen neix ndaej gij fwen lai singbouh Bouxcuengh yingjyangj lai dangqmaz. Ciengzbaez gyoengq canghfwen doxdoi eu ne, couh youz bouxsae canghfwen eu coenz daih' it, liuxle gyoengq canghfwen swnj eu roengzbae.

Ndaw fwen neiyungz haemq lai, miz fwenyoux sai mbwk doxgyau gamjingz, miz fwenhaenh hoh fungsou, miz fwenhaenh haenh cwngcwz fouqminz aen dangj. Ciengzbaez gvaq ciet roxaeuz seizcou souhaeuj liuxle, vunzlai couh doxcomz doiq fwen, neix dwg gienh saeh hungmbwk gvendaengz vunz dangdieg gvaq ciet.

Bi 2008, fwen Vahsengj lai singbouh Bouxgun Sunghbwz ginggvaq Gvangsijh Bouxcuengh Swcigih Yinzminz Cwngfuj doengzeiq, ndaej lied haeuj daihngaih buek swcigih gaep feihvuzciz vwnzva yizcanj mingzloeg.